

# A Ezio Bortolussi

ALBERTO FELICE DE TONI

Ai 26 di Lui dal 2019 tant che Magnific Retôr de Universitât dai Studis di Udin o ai vût l'onôr di premiâ cu la lauree honoris causa in Inzegnarie Civîl il cav. Ezio Bortolussi. E je stade une cerimonie une vore sintude e partecipade che e à rapresentât un event speciâl pe nestre Universitât e pal Friûl.

La atribuzion di une lauree honoris causa e je il plui alt ricognossiment che la istituzion universitarie e da a chei che, in grazie de ricjece des competencis cjapadis sù e de originalitât des propriis ideis, ancje aplicadis, a àn dimostrât di jessi un pont di riferiment pal setôr dulà che a operin. No si trate duncje di dâ un sempliç premi. La lauree honoris causa, di fat, e je il risultât di un percors articolât e profont che, a scomençâ dal cuarp docent dal Dipartiment di riferiment – in chest câs il Dipartiment Politecnic di Inzegnarie e Architeture – al puarte dute la comunitât universitarie a identificâsi e a ricognossisi tal candidat, di là des distinzions dissiplinârs.

Ma, permetêmi, al è alc di plui. Ai 27 e 28 di Lui dal stes an a Tumieç e je stade la XVI Convention e l'Incuintri Anuâl dai Furlans tal Mont. In cheste prospettive, la lauree magjistrâl in Inzegnarie Civîl honoris causa a Ezio Bortolussi e à cjapât un significât inmò plui grant.

Ezio Bortolussi al è stât un emigrant, un dai plui di 350.000 furlans che, dal 1946 al 1970, a espatriarin par cirî fortune, o ancje dome par vê un “avignû” in tiere foreste.

Al lassà Darzin pe Svuizare tal 1960 cuant che al veve a pene disesiet agns, cun cognossincis technichis di base.

Al imparà il mistîr cu la pratiche tai cantîrs a Zenevre; si miorà cun cors serâi tor de metât dai agns '60. Une volte rivât in Canadà al acetà la sfide dal coordinament dal cantîr, impegnantsi te realizazion di costruzions simpri plui grandis. E cussì al imparà sul cjamp gnovis tecnicis di costruzion, al elaborà soluzions inovativis, fint a fondâ tal 1984 la sô aziende, la *NewWay Forming*, che di in chês volte e je diventade un riferiment di ecelence tal Nord Americhe pe realizazion a alte tecnologjie di grancj edificis e costruzions altis di ciment armât.

*NewWay* al vûl dî “Grove Vie” e par Ezio Bortolussi chest tiermin al è ancje sinonim di un mût diferent e gnûf di concepî il lavôr tal mont des grandis costruzions, di progjetâ e gjestî il cantîr edil. *NewWay* però e je ancje la capacitât di meti dongje inovazion e tradizion te gjestion des risorsis professionâls e umanis, di valorizâ lis capacitâts di colaboradôrs e coleghis, di mantignî i timps e i obietîfs dal progjet, tal plen rispiet de sigurece tal ambient di lavôr.

La *NewWay* e à realizât plui di 400 grancj edificis tai ultins trentecinc agns. Cualchidun di chei a son aromai elements architetonics e di ingegnarie indispensabii in diviersis citâts dal Canadà e dal Nord Americhe in gjenerâl.

Daûr de realizazion di chestis grandis oparis al è un impegn grant e continui tal studi di soluzions di ingegnarie inovativis par risolti i problemis di tecnologjie strutturâl e costrutive tipiche dai cantîrs cun grande complessitât e in areis citadinis cetant urbanizadis. Tra chestis soluzions, cence pretendi di dîlis dutis, o ricuardìn la realizazion in continui di grandis gjetadis di beton, sistemis originâi di ancorament aes structuris dal edifici in costruzion des gruis rampantis internis, la introduzion di sistemis di casseradure autopuartante pe gjetade rapide di orizontaments.

La inovazion e la validitât des soluzions proponudis di Bortolussi in chestis realizacions a son testimoneadis di tancj encomis vûts dai tancj comitents des oparis e de publicazion des costruzions plui significativis su impuartantis rivistis dal setôr.

La esperience di Ezio Bortolussi però, e à une valence plui fuarte e profonde. In lui o tornìn a viodi la esperience e la costance dai nestris vielis manoai e mestris. In lui o tornìn a viodi la savietât tecniche de

grande tradizion dai costrutôrs e dai imprenditôrs furlans. Il so percors personâl e professionâl nus permet di dî che il sucès dal Model Friûl te ricostruzion daspò dal taramot dal 1976 nol sedi stât dome par câs ma che, impen, la Int Furlane e à, forsit tal sô DNA, une volontât e une capacitât di “fâ” naturâl, che i permet di saltâ fûr anje dopo grandis burascjîs.

In conclusion, la laurea ad honorem dade a Ezio Bortolussi e je stade pal sigûr un ricognossiment ai grancj contribûts di inovazion e di avanzament des cognossincis di inzegnarie tal setôr de progietazion e de gjestion dal cantîr edîl che lui al à puartât. Tal stes timp, al è stât anje un messaç di entusiasim e sperance pes gnovis gjenerazions di tecnics che la Universitât dal Friûl e forme te Inzegnarie Civîl, par che si convincedin che l'impegn e la fiducie tai lôr mieçs a son imprescj che ur puedin permeti di cjapâ sù, frontâ e vinci lis gnovis sfidis che si cjatin tal mont des grandis costruzions.

O sieri metintjûs chi sot la letare che Ezio Bortolussi mi à mandât pôc plui di un an dopo il conferiment de laurea honoris causa e la mê rispueste. Il valôr des robis tal timp al è simpri plui clâr.

*Ai 2 di Setembar dal 2020*

Preseât prof. Alberto Felice De Toni,

al è passât pôc plui di un an di cuant che mi è stade dade la onorificence plui impuartante, stimantmi plui di chel che o pues vê meretât.

O voi indevant tal gno lavôr e o viôt che cu la volontât e la costance si rive inmò a jessi presints intun marcjât difcil ma plen di entusiasim, viert e plen di sodisfazions. Ogni dì o voi in ufici dulà che o cîr di fâ cun passion e impegn il gno compit di om e imprenditôr cjatant problemis ma anje soluzions e sodisfazions.

Tal gno ufici e je picjade la pergamene che tu mi âs consegnât e che o soi une vore braurôs, un titul che mi onore e che mi fâs vignî i sgrisui tal leile e mi puarte indaûr cu lis emozions tal moment de consegne. Dispès o condivît cui amîs, dipendents, clients e furnidôrs: o mostri cualchi foto e mi maravei simpri pe tô/vuestre gjenerositât.

O soi braurôs di jessi furlan e di vê vût de Universitât dal Friûl un titul cussì preseât e impuartant.

O puarti tal cûr i incuintris cun te e cui professôrs che o ai cognossût: a lôr ur va il gno salût e ringraciament.

A ti, permetimi, cjâr Alberto un segn di stime profonde e di grande vicinace cui auguris di une vite plene e di sucès.

*Cav. Ezio Bortolussi*

*Ai 22 di Setembar dal 2020*

Cjâr Ezio,

ti ringracii di cûr de letare che tu âs volût mandâmi dopo un an dal conferiment ae tô persone de lauree honoris causa di bande de Universitât dal Friûl. Mi fâs plasê che – ancje intun moment di dificultât come chel che o stin vivint – tu tu rivedis a puartâ indevant il to lavôr di imprenditôr cun costance e volontât: dôs cualitâts che, o soi sigûr, no ti lassaran mai.

Ancje se no soi plui Magnific Retôr, i ten a mantignî salts e vîfs i rapuarts cui oms e lis feminis che la Universitât dal Friûl e à volût premiâ. Oms e feminis di coraç e intraprendents, che a àn savût sfidâ il discognossût frontant e superant cun ustinazion moments e situazions dificilis. Oms e feminis che “cjalant ad alt, a lavôr finît, a incuintrin il cîl, il soreli, la lune, i nûi e lis stelis... e che a vuelin lassâ une olme di sperance e gjonde”. Tornant a pensâ a chestis tôs bielissimis peraulis, ditis te tô storiche Lectio Magistralis, o torni a percori la tô storie di om prime e di imprenditôr dopo, bon di fondâ il so sucès su la fiducie tes personis e lis capacitâts professionâls. O soi convint che i oms come te a sedin une font di ispirazion cence fin pai nestris students e in generâl pes gnovis generazions.

O torni a rinovâ, duncje, il spirt di cuant che il nestri ateneu ti à conferide la lauree magistral ad honorem in Inzegnarie Civîl: un alt ricognossiment par un om che si è fat preseât ambasadôr tal mont de miôr tradizion dal Friûl, fondade sul lavôr, l'impegn, l'inzen e la capacitât di cooperazion.

Come che al disè Hermann Hesse: “La plui part dai oms a son come une fuee secje, che e svole tal aiar e e ven jù ben planc fint par tiere. Ma altris, pôcs, a son come stelis fissis, che a van daûr di un lôr cors precîs, e nol è aiar che ju tocje, a àn cun lôr la lôr leç e il lôr percors”.

Ti mandî i miei salûts plui cjârs, o sperî di tornâ a vioditi ae prossime ocasion in Friûl.

*Alberto Felice De Toni*

*Alberto Felice De Toni*  
Za Retôr de Universitât di Udin